



Mkate wa Uzima na Vazi

la Haki

Kwa maana chakula cha Mungu ni kile kishukacho kutoka mbinguni na kkuupa ulimwengu uzima.—Yohana 6:33.

“Ikiwa ninyi ... mnajua kuwapa watoto wenu vipawa vyema, je! Baba aliye mbinguni hatazidi sana kuwapa Roho Mtakatifu hao wamwombao?” (Luka 11:13). Roho Mtakatifu, mwakilishi Wake Mwenyewe, ni karama kuu kuliko zote. Yote “mambo mazuri” yanapatikana hapa. Muumba Mwenyewe hawezi kutupatia kisicho kikuu Zaidi wala kisicho bora Zaidi. Tunapomwomba Bwana atuhurumie katika dhiki zetu, na kutuongoza kwa Roho Wake Mtakatifu, kamwe hatayatupilia mbali maombi yetu.

Inawezekana kabisa kwa mzazi kugeukia mbali na mtoto wake mwenye njaa, lakini Mungu kamwe hawezi kukikataa kilio cha moyo wenye uhitaji na wenye shauku. Ni kwa upole wa ajabu jinsi gani Ameeleza upendo Wake! Kwa wale ambao katika siku za giza wanahisi kwamba Mungu hawajali, huu ndio ujumbe kutoka kwa moyo wa Baba: “Bali Sayuni alisema, YEHOVA ameniacha, Bwana amenisahau. Je! Mwanamke aweza kumsahau mtoto wake anyonyaye, hata asimhurumie mwana wa tumbo lake? Naam, hawa waweza kusahau, lakini mimi sitakusahau wewe. Tazama, nimekuchora katika vitanga vya mikono yangu” (Isaya 49:14–16).

Kila ahadi katika Neno la Mungu hutupatia mada kwa ajili ya maombi, ikionesha neno la Yehova lililoahidiwa kuwa uhakikisho wetu. Baraka zozote za kiroho tunazohitaji, ni fursa yetu kudai kupitia kwa Yesu. Tunaweza kumwambia Bwana, kwa usahili wa mtoto, kile hasa tunachokihitaji. Tunaweza kumwambia mambo yetu ya kitambo, tukimwomba atupe mkate na mavazi pamoja na mkate wa uzima na vazi la haki ya Kristo. Baba yenu wa mbinguni anajua kwamba mnahitaji vitu hivi vyote, na mnatakiwa kumwomba kuhusiana navyo. Ni kupitia kwa jina la Yesu kwamba kila fadhila inapokelewa. Mungu atalithamini jina hilo, na kisha atawapatia mahitaji kutoka kwenye utajiri wa ukarimu Wake.

Lakini usisahau kwamba katika kumjia Mungu kama Baba unatambua uhusiano wako Kwake kama mtoto. Hauamini tu wema Wake, bali katika kila kitu unajisalimisha kwa mapenzi Yake, ukijua kuwa upendo Wake haubadiliki. Unajitoa ili kufanya kazi Yake. Ilikuwa ni kwa wale ambao amewasihi kuutafuta kwanza ufalme wa Mungu na haki Yake kwamba Yesu aliwapa ahadi, “Ombeni, nanyi mtapewa” (Yohana 16:24).

Zawadi Zake Yeye mwenye mamlaka yote mbinguni na duniani ziko ghalani kwa ajili ya watoto wa Mungu. Zawadi za thamani sana ambazo huja kwetu kupitia dhabihu ya gharama ya damu ya Mkombozi; zawadi ambazo zitatoshleza tamaa kubwa zaidi ya moyo, zawadi za kudumu milele, zitapokelewa na kufurahiwa na wote ambao watakuja kwa Mungu wakiwa kama watoto wadogo. Zichukue ahadi za Mungu kuwa zako, ziombe mbele Zake kama Neno Lake mwenyewe linavyosema na kisha utapokea furaha kamilifu (Thoughts from the Mount of Blessing, 132–134).